

Қазақстан Республикасы Үкіметінің кейбір шешімдеріне өзгерістер енгізу туралы

Қазақстан Республикасы Үкіметінің 2026 жылғы 29 сәуірдегі № 346 қаулысы.

Қазақстан Республикасының Үкіметі **ҚАУЛЫ ЕТЕДІ:**

1. Қоса беріліп отырған Қазақстан Республикасы Үкіметінің кейбір шешімдеріне енгізілетін өзгерістер бекітілсін.

2. Осы қаулы қол қойылған күнінен бастап қолданысқа енгізіледі және ресми жариялануға тиіс.

Қазақстан Республикасының
Премьер-Министрі

О. Бектенов

Қазақстан Республикасы
Үкіметінің
2026 жылғы 24 сәуірдегі
№ 346 қаулысымен
бекітілген

Қазақстан Республикасы Үкіметінің кейбір шешімдеріне енгізілетін өзгерістер

1. "Қазақстан Республикасының Үкіметі мен Қазақстан Республикасы Ұлттық Банкінің өңдеу өнеркәсібіндегі шағын және орта кәсіпкерлік жобаларын қаржыландыруды қамтамасыз ету жөніндегі бірлескен іс-қимыл жоспарын бекіту туралы" Қазақстан Республикасы Үкіметінің 2014 жылғы 14 сәуірдегі № 354 қаулысында:

көрсетілген қаулымен бекітілген Қазақстан Республикасының Үкіметі мен Қазақстан Республикасы Ұлттық Банкінің өңдеу өнеркәсібіндегі шағын және орта кәсіпкерлік жобаларын қаржыландыруды қамтамасыз ету жөніндегі бірлескен іс-қимыл жоспарында:

"Мақсатқа қол жеткізу және алға қойылған міндеттерді іске асыру тетіктері" деген 2-бөлім, "Қаражатты екінші деңгейдегі банктерге шартты түрде орналастырудың шарттары мен тетіктері" деген 3-бөлім және "Шағын және орта кәсіпкерлік субъектілерін қаржыландыру шарттары" деген 4-бөлім мынадай редакцияда жазылсын:

"2. Мақсатқа қол жеткізу және алға қойылған міндеттерді іске асыру тетіктері

Қазақстан Республикасының Үкіметі өңдеу өнеркәсібіндегі ШОК жобаларына кейіннен кредит беру үшін ЕДБ-ны қаржыландыру бойынша шара қолданатын болады.

Өңдеу өнеркәсібіндегі ШОК жобаларын Қазақстан Республикасы Ұлттық қорының қаражатынан қаржыландырудың жалпы көлемі 100 (жүз) миллиард теңгені құрайды.

Қазақстан Республикасы Ұлттық қорының қаражатын пайдалану "Даму" кәсіпкерлікті дамыту қоры" акционерлік қоғамының (бұдан әрі – "Даму" КДҚ) АҚ) қаражатын өңдеу өнеркәсібіндегі ШОК субъектілерін қаржыландыру үшін ЕДБ-ге

шартты түрде орналастыру жолымен жүзеге асырылады. Мақсатқа сай пайдалану шарты "Alatau City Bank" акционерлік қоғамы (бұдан әрі – "Alatau City Bank" АҚ) берген қарыздарға қолданылмайды.

Бұл мақсат үшін "Бәйтерек" ұлттық инвестициялық холдингі" акционерлік қоғамы (бұдан әрі – "Бәйтерек" ҰИХ" АҚ) облигациялар айналысы басталған күннен бастап 20 жылға дейінгі мерзімге жылдық 0,1 % сыйақы мөлшерлемесі бойынша 100 (жүз) миллиард теңге сомасына облигация шығару жолымен Қазақстан Республикасының Ұлттық қорынан қарыз алуды жүзеге асырады. Облигациялық қарызды өтеу мерзімі – айналыс мерзімінің соңында, 2024 жылдан бастап эмитенттің бастамасы бойынша мерзімінен бұрын өтеу құқығы болады.

Қаражатты алғаннан кейін "Бәйтерек" ҰИХ" АҚ "Даму" КДҚ" АҚ-ға жасалған тиісті кредиттік шарт талаптарына сәйкес қаражатты мерзім соңында бір сомамен өтеу шартымен жылдық 0,15 % сыйақы мөлшерлемесі бойынша 20 жылға дейінгі мерзімге 100 (жүз) миллиард теңге сомасына кредит береді.

3. Қаражатты екінші деңгейдегі банктерге шартты түрде орналастырудың шарттары мен тетіктері

ЕДБ тізбесі мен олар бойынша лимиттер сомасын "Бәйтерек" ҰИХ" АҚ Қазақстан Республикасының экономикасын жаңғырту мәселелері жөніндегі мемлекеттік комиссияның (бұдан әрі – Мемлекеттік комиссия) қарауына шығарады. Мемлекеттік комиссия түпкі қарыз алушылар үшін жылдық тиімді сыйақы мөлшерлемесін қалыптастыру тәсілдері бойынша ұсынымдар тұжырымдайды.

"Бәйтерек" ҰИХ" АҚ, "Даму" КДҚ" АҚ және ЕДБ Қазақстан Республикасының Ұлттық қорынан бөлінетін қаражаттан төлем жүргізу үшін ҚРҰБ-да жеке банктік шот ашады.

"Бәйтерек" ҰИХ" АҚ Қазақстан Республикасының азаматтық заңнамасына сәйкес жасалған кредиттік шарт бойынша қаражат сомасын "Даму" КДҚ" АҚ-ның ҚРҰБ-дағы жеке банктік шотына орналастырады.

"Даму" КДҚ" АҚ Қазақстан Республикасының азаматтық заңнамасына сәйкес ЕДБ-мен кредиттік келісімдер жасасуды жүзеге асырады.

"Даму" КДҚ" АҚ алынған кредит қаражатын ЕДБ-да жылдық 2,0 %-дан аспайтын мөлшерлеменен орналастырады.

"Даму" КДҚ" АҚ кредит қаражатын ЕДБ-ның ҚРҰБ-дағы жеке банктік шотына орналастыруды Мемлекеттік комиссия мақұлдаған лимиттер шегінде қамтамасыз етпей жүзеге асырады.

ЕДБ кредит валютасы – теңге.

ЕДБ кредит мерзімі – 20 жылға дейін.

Қаражат ЕДБ шотына түскен күннен бастап ЕДБ-ның кредиттік қаражатты игеру мерзімі:

инвестициялық мақсаттарға берілетін кредиттер бойынша – 3 ай;

айналым қаражатын толықтыру және бұрын берілген ЕДБ қарыздарын қайта қаржыландыру мақсаттарына берілетін кредиттер бойынша – 3 ай.

Негізгі борыш пен сыйақыны өтеу шарттары мен тәртібі кредиттік келісімде белгіленеді.

ЕДБ орналастырылған кредит қаражатының мақсатқа сай пайдаланылуы мен игерілуі бойынша "Даму" КДҚ" АҚ алдында есеп береді.

ЕДБ есептерін ұсыну тәртібі, нысаны мен кезеңділігі, сондай-ақ ЕДБ-ге кредит берудің осы Жоспарда көзделмеген өзге шарттары, оның ішінде: экспорттық түсімнің бар-жоғын айқындауға арналған ковенанттар тиісті кредиттік келісімде белгіленеді. Экспорт алдындағы/экспорттық қаржыландыру және/немесе экспортқа бағдарланған жобаларды қаржыландыру үшін іріктеу кезінде басымдық осындай жобаны қаржыландыру басталған күннен бастап 1 (бір) қаржы жылынан кейін экспорттық түсімнің жыл сайын кемінде 5 % өсуін қамтамасыз ететін жобаларға берілуге тиіс. ШОК субъектілерінің экспорттық түсімінің көлемін мұндай жобаны қаржыландыру туралы шешім қабылданғанға дейін алдыңғы 2 (екі) жыл ішіндегі экспорттық түсімнің орташа жылдық көлемі деңгейінде сақталуын қамтамасыз ететін экспорт алдындағы/экспорттық қаржыландыруға және/немесе экспортқа бағдарланған жобаларды қаржыландыруға жол беріледі.

ЕДБ бөлінетін қаражатты ШОК субъектілерінің қолданыстағы инвестициялық кредиттерін орналастырылған қаражат сомасының 50 %-ына дейін қайта қаржыландыру мақсатына жібереді.

ЕДБ тарапынан ерте дегенде 2026 жылғы 1 қаңтардан қаржыландырылған өңдеу өнеркәсібіндегі ШОК субъектілеріне жаңа жобаларға берілген ЕДБ-нің қарыздары бойынша қайта қаржыландыруға жол беріледі.

2019 жылдан бастап ШОК субъектілерін қаржыландырудан қайтарылған қаражат есебінен 50 (елу) миллиард теңге Қазақстан Республикасының Ұлттық қор қаражатының айналыс мерзімінің соңына дейін қайтарылатын негізде экспорттау алдындағы/экспорттық қаржыландыруға және/немесе экспортқа бағдарланған жобаларды қаржыландыруға жіберілетін болады.

Экспорт алдындағы/экспорттық қаржыландыру – өнімді өндіруге және экспортқа өткізуге байланысты айналым қаражатын толықтыруға ШОК субъектілерінің жобасын қаржыландыру. Экспортқа бағдарланған жобаларды қаржыландыру – кейіннен экспорт үшін өнім өндіру мақсатында инвестициялық шығындарды жүзеге асыруға ШОК субъектілеріне қаражат беру.

Пропорцияларды сақтау ЕДБ-нің қаражатын екінші рет орналастыруға қолданылмайды.

"Даму" КДҚ" АҚ босаған кредит қаражатын ЕДБ-ға қайтадан кредит беруге жұмсайды.

ЕДБ орналастырылатын қаражатты мақсатқа сай пайдаланбаған, толықтай немесе ішінара игермеген жағдайларда, сондай-ақ кредиттік келісімде көзделген өзге де жағдайлар туындаған кезде "Даму" КДҚ" АҚ ЕДБ-ге қатысты кредиттік келісімнің талаптарына сәйкес шаралар, оның ішінде кредиттік келісімдерді мерзімінен бұрын бұзу және/немесе орналастырылған қаражатты, кейін оларды басқа ЕДБ-лер арасында қайта бөле отырып кері қайтарып алу және/немесе ЕДБ портфелін (ШОК субъектілеріне банктік қарыз шарттары бойынша құқықтарды (талаптарды) басқа ЕДБ-ге беру мәселесіне бастама көтеру шараларын қолданады. Қайтарып алынған, ЕДБ мерзімінен бұрын өтеген қаражатты қайта бөлу, сондай-ақ ЕДБ портфелін (ШОК субъектілеріне банктік қарыз шарттары бойынша құқықтарды (талаптарды) басқа ЕДБ-ге беру ЕДБ арасында Мемлекеттік комиссияның ұсынымдарын ескере отырып жүзеге асырылады.

ЕДБ ай сайынғы негізде ШОК субъектілерінің бұрын берілген қарыздарын өтеу есебінен босаған қаражатты ҚРҰБ-дағы өзінің жеке банктік шоттарына есепке жазуды жүзеге асырады. Бұл ретте ЕДБ үш ай ішінде қаражатты ШОК субъектілеріне одан әрі кредит беруге жібереді не "Даму" КДҚ" АҚ-ның ҚРҰБ-дағы жеке банктік шоттарына мерзімінен бұрын қайтарады.

"Alatau City Bank" АҚ берген қарыздарға:

мақсатқа сай пайдалану шарты;

ҚРҰБ-да шот ашу бойынша ЕДБ-ға қойылатын талаптар;

"Даму" КДҚ" АҚ-ға орналастырылған кредиттік қаражатты мақсатқа сай пайдалану жөнінде есеп беру бойынша ЕДБ-ға қойылатын талаптар қолданылмайды.

4. Шағын және орта кәсіпкерлік субъектілерін қаржыландыру шарттары

Нысаналы топ – осы Жоспарға 1-қосымшаға сәйкес жобаларды өңдеу өнеркәсібінде іске асыратын және (немесе) іске асыруды жоспарлап отырған ШОК субъектілері.

Мына ШОК субъектілері қатысушы бола алмайды:

1) Қазақстан Республикасының заңнамасына сәйкес дәрілік зат ретінде тіркелген құрамында спирт бар медициналық мақсаттағы өнім (бальзамдардан басқа) шығару көзделетін жобаларды қоспағанда, акцизделетін тауар шығару көзделетін жобаларды іске асыратын;

2) акцияларының (жарғылық капиталғы қатысу үлестерінің) елу және одан көп пайызы тікелей мемлекеттік кәсіпорындарға/мекемелерге, ұлттық басқарушы холдингтерге, ұлттық холдингтерге, ұлттық компанияларға тиесілі;

3) жұмыс істеп тұрған кәсіпорындар қайта ұйымдастырылған және (немесе) кредит сомасы 60 (алпыс) миллион теңгеден аспайтын жағдайларды қоспағанда, мемлекеттік тіркелгенінен бері алты айдан аз уақыт өткен;

4) кредиттің мақсаты қайта қаржыландыру болып табылатын жағдайларды қоспағанда, кредиттік бюроның деректеріне сәйкес кредит берілген немесе кредиттік

өтінім берілген сәтте күнтізбелік тоқсан күннен астам мерзімге кешіктірілген несиелік берешегі бар;

5) "Банктік және сақтандыру қызметінің, бағалы қағаздар рыногының кәсіби қатысушылары қызметінің және бағалы қағаздар рыногындағы лицензияланатын басқа да қызмет түрлерінің, акционерлік инвестициялық қорлар және микроқаржылық қызметті жүзеге асыратын ұйымдар қызметінің мақсаттары үшін офшорлық аймақтардың тізбесін белгілеу туралы" Қазақстан Республикасының Қаржы нарығын реттеу және дамыту агенттігі басқармасының 2020 жылғы 24 ақпандағы № 8 қаулысында көрсетілген офшорлық аймақтарда тіркелген, сондай-ақ қатысушылары және (немесе) акционерлері офшорлық аймақтарда тіркелген.

ШОК субъектілерінің мақұлданған өтінімдеріне кредит беру мақсатында ЕДБ ҚРҰБ-дағы жеке банктік шотынан қаражатты есептен шығару үшін қажетті соманы "Даму" КДҚ" АҚ-мен алдын ала келісуді жүзеге асырады. Бұл ретте қаражаттың мақсатқа сай пайдаланылуын түпкілікті тексеруді "Даму" КДҚ" АҚ ШОК субъектілері жобаны іске асыратын жерге барғаннан кейін жүзеге асырады.

Кредиттер ШОК субъектілеріне мақсатқа сай пайдалану, ақылылық, мерзімділік, қайтарымдылық және қамтамасыз етілу шарттарымен беріледі.

Кредит валютасы – теңге.

ШОК субъектілеріне кредит беру мақсаты:

1) негізгі құралдардың түпкілікті қарыз алушылар үшін жаңаларын (яғни түпкілікті қарыз алушылар алғаш пайдаланатын) сатып алу, құру және жаңғырту;

2) әрбір ЕДБ-ге кредит қаражаты сомасының 50 %-ына дейін қолданыстағы инвестициялық кредиттерді қайта қаржыландыру;

3) экспорт алдындағы/экспорттық қаржыландыру және/немесе экспортқа бағдарланған жобаларды қаржыландыру мақсаттары үшін айналым қаражатын толықтыру және (немесе) инвестициялық жобаларды қаржыландыру.

ЕДБ тарапынан ерте дегенде 2026 жылғы 1 қаңтардан қаржыландырылған өңдеу өнеркәсібіндегі ШОК субъектілеріне жаңа жобаларға берілген ЕДБ-нің қарыздары бойынша қайта қаржыландыруға жол беріледі.

Өзге шарттар кредиттік келісімде айқындалады.

ШОК субъектілері үшін номиналды сыйақы мөлшерлемесі жылына 12,6 %-дан аспайды, бұл ретте сыйақы мөлшерлемесінің көрсетілген мөлшері Қазақстан Республикасы Ұлттық қорының қаражатын ЕДБ қаражатымен микширлеу есебінен белгіленеді.

Бір ШОК субъектісіне/байланысты тұлғалар тобы үшін қаржыландырудың ең жоғары лимиті – "Даму қоры" АҚ қаражатын шартты түрде орналастырудың барлық бағдарламалары бойынша ағымдағы міндеттемелер ескерілгенде 7 (жеті) миллиард теңге.

ШОК субъектілеріне кредит беру мерзімі – 10 жылға дейін.

Уәкілетті орган сұрау салуды алған күннен кейін 7 (жеті) жұмыс күні ішінде жобаны қаржыландырудың салалық орындылығы немесе орынсыздығы туралы қорытынды береді.

Осы бөлімнің шарттары "Alatau City Bank" АҚ берген қарыздарға қолданылмайды."

;

"Мемлекеттік қолдаудың қосымша шаралары" деген 6-бөлім мынадай редакцияда жазылсын:

"6. Мемлекеттік қолдаудың қосымша шаралары

Осы Жоспар шеңберінде қаражат алатын ШОК субъектілерінің жаңа жобаларын қаржыландыруды ынталандыру үшін "Даму" КДҚ" АҚ іске асыратын бағдарламалар шеңберінде "Даму" КДҚ" АҚ-ның жаңа жобалар бойынша кредиттерге кепілдік беру тетігін қолдануы көзделеді.";

"Мониторинг" деген 7-бөлімде:

төртінші бөлік мынадай редакцияда жазылсын:

"ЕДБ тұрақты негізде "Даму" КДҚ" АҚ-ға қаражаттың игерілуі туралы есеп жіберіп тұратын болады, есеп беру нысаны мен мерзімдері тиісті кредиттік келісімде көрсетіледі. Бұл ақпаратты "Даму" КДҚ" АҚ Қазақстан Республикасы Президентінің 2025 жылғы 19 мамырдағы № 879 Жарлығымен құрылған Қазақстан Республикасының Ұлттық қорынан бөлінген қаражаттың жұмсалуды мониторингтеу жөніндегі комиссияға (бұдан әрі – Комиссия) және "Бәйтерек" ҰИХ" АҚ-ға береді.";

сегізінші бөлік мынадай редакцияда жазылсын

"Даму" КДҚ" АҚ-ның осы Жоспарды іске асыруға қатысатын ЕДБ-ның қаржылық-экономикалық жағдайын талдауды тұрақты негізде жүзеге асыру міндеттемесін қоспағанда, осы бөлімнің шарттары "Alatau City Bank" АҚ берген қарыздарға қолданылмайды.";

көрсетілген Жоспарға 1-қосымша осы өзгерістерге 1-қосымшаға сәйкес жаңа редакцияда жазылсын;

көрсетілген Жоспарға 1-1-қосымша алып тасталсын.

2. "Қазақстан Республикасының Үкіметі мен Қазақстан Республикасы Ұлттық Банкінің өңдеу өнеркәсібінде кәсіпкерлік субъектілерін қаржыландыруды қамтамасыз ету жөніндегі бірлескен іс-қимыл жоспарын бекіту туралы" Қазақстан Республикасы Үкіметінің 2014 жылғы 5 желтоқсандағы № 1276 қаулысында:

көрсетілген қаулымен бекітілген Қазақстан Республикасының Үкіметі мен Қазақстан Республикасы Ұлттық Банкінің өңдеу өнеркәсібінде кәсіпкерлік субъектілерін қаржыландыруды қамтамасыз ету жөніндегі бірлескен іс-қимыл жоспарында:

"Ағымдағы жағдайды талдау" деген бөлімде:

жетінші және сегізінші бөліктер мынадай редакцияда жазылсын:

"Осы Қазақстан Республикасының Үкіметі мен Қазақстан Республикасы Ұлттық Банкінің өңдеу өнеркәсібінде кәсіпкерлік субъектілерін қаржыландыруды қамтамасыз ету жөніндегі бірлескен іс-қимыл жоспары (бұдан әрі – Жоспар) кәсіпкерлік субъектілеріне мынадай бағыттар бойынша қолдау көрсетуге бағытталған шаралар кешенін айқындайды:

бірінші бағыт: "Даму" кәсіпкерлікті дамыту қоры" акционерлік қоғамы (бұдан әрі – "Даму" КДҚ" АҚ) тізбесін Қазақстан Республикасының экономикасын жаңғырту мәселелері жөніндегі мемлекеттік комиссия мақұлдаған екінші деңгейдегі банктерге (бұдан әрі – ЕДБ) осы Жоспарға 1-қосымшаға сәйкес өңдеу өнеркәсібіндегі және өңдеу өнеркәсібіне қызмет көрсетуге қатысты көрсетілетін қызметтер саласындағы шағын және орта кәсіпкерлік субъектілерін (бұдан әрі – ШОКС) қаржыландыру үшін, сондай-ақ жұмыс істеп тұрған өндіріс қуаттарын жүктеу үшін кәсіпорынның айналым қаражатын толықтыруға кредит береді (қаражатты шартты түрде орналастыру жолымен) (бұдан әрі – бірінші бағыт) (мақсатқа сай пайдалану шарты "Alatau City Bank" акционерлік қоғамы (бұдан әрі – "Alatau City Bank" АҚ) берген қарыздарға қолданылмайды);

екінші бағыт: осы Жоспарға 2-қосымшаға сәйкес өңдеу өнеркәсібіндегі ірі кәсіпкерлік субъектілерін (бұдан әрі – ІКС) қаржыландыру үшін "Қазақстанның Даму Банкі" акционерлік қоғамының (бұдан әрі – "ҚДБ" АҚ) ЕДБ-ға банкаралық кредит беруі (бұдан әрі – екінші бағыт) (мақсатқа сай пайдалану шарты "Alatau City Bank" АҚ берген қарыздарға қолданылмайды).

Тамақ өнеркәсібі саласындағы жобаларға екінші бағыт бойынша кредит беру осы Жоспарға 2-1-қосымшаға сәйкес тамақ өнеркәсібінің қаржыландыруға арналған салаларының тізбесіне (бұдан әрі – тізбе) сәйкес жүзеге асырылады. Бұл ретте, тамақ өнеркәсібі саласындағы жобаның нысаналы мақсатын растау үшін экономикалық қызмет түрлерінің жалпы жіктеуішінің (бұдан әрі – ЭҚЖЖ) нақты кодына байланыстырылған тізбеден кемінде бір тауар түрін шығару жеткілікті. Көрсетілетін қызметтер саласы үшін ЭҚЖЖ кодтарына жатқызу сәйкестік өлшемшарты болып табылады.";

"Жалпы ережелер" деген бөлімде:

"Мақсатқа қол жеткізу және алға қойылған міндеттерді іске асыру тетіктері" деген кіші бөлім мынадай редакцияда жазылсын:

"Мақсатқа қол жеткізу және алға қойылған міндеттерді іске асыру тетіктері

Қазақстан Республикасы Үкіметінің 2014 жылғы 14 сәуірдегі № 354 қаулысымен бекітілген Қазақстан Республикасының Үкіметі мен Қазақстан Республикасы Ұлттық Банкінің өңдеу өнеркәсібіндегі шағын және орта кәсіпкерлік жобаларын қаржыландыруды қамтамасыз ету жөніндегі бірлескен іс-қимыл жоспарын іске асыруды жалғастыра отырып, Қазақстан Республикасының Үкіметі, ҚРҰБ, "Бәйтерек" ұлттық инвестициялық холдингі" акционерлік қоғамы (бұдан әрі – "Бәйтерек" ҰИХ"

АҚ) өңдеу өнеркәсібінде және өңдеу өнеркәсібіне қызмет көрсетуге қатысты көрсетілетін қызметтер саласындағы ШОКС-ны кейіннен қаржыландыру үшін, сондай-ақ жұмыс істеп тұрған өндіріс қуаттарын жүктеу үшін және өңдеу өнеркәсібінде ІКС-ні қаржыландыру үшін ШОКС-ның айналым қаражатын толықтыруға ЕДБ-ні қаржыландыру бойынша қосымша шаралар қабылдайтын болады.

2014 жылы Қазақстан Республикасы Ұлттық қорының (бұдан әрі – ҚР ҰҚ) қаражатынан жоғарыда аталған шараларды іске асыру үшін ШОКС-ны және ІКС-ні қосымша қаржыландырудың жалпы көлемі 100 (жүз) миллиард теңгені құрайды.

"Бәйтерек" ҰИХ" АҚ облигациялар айналысы басталған күннен бастап 20 жылға дейінгі мерзімге жылдық 0,1 % сыйақы мөлшерлемесі бойынша 100 (жүз) миллиард теңге сомасына облигация шығару жолымен ҚР ҰҚ-дан қарыз алуды жүзеге асырады. Облигациялық қарызды өтеу мерзімі – айналыс мерзімінің соңында, 2024 жылдан бастап эмитенттің бастамасы бойынша мерзімінен бұрын өтеу құқығы болады.

Қаражат алғаннан кейін "Бәйтерек" ҰИХ" АҚ:

1) "Даму" КДҚ" АҚ-ға жасалған кредиттік шарт талаптарына сәйкес мерзім соңында қаражатты бір сомамен өтеу шартымен жылдық 0,15 % сыйақы мөлшерлемесі бойынша 20 жылға дейінгі мерзімге 50 (елу) миллиард теңге сомасына кредит береді;

2) "ҚДБ" АҚ-ға жасалған қарыз шартының талаптарына сәйкес мерзім соңында қаражатты бір сомамен өтеу шартымен жылдың 0,15 % сыйақы мөлшерлемесі бойынша 20 жылға дейінгі мерзімге 50 (елу) миллиард теңге сомасына кредит береді.";

"Қаражатты екінші деңгейдегі банктерге шартты түрде орналастырудың шарттары мен тетіктері" деген кіші бөлім:

1-тармақ мынадай редакцияда жазылсын:

"1. Қазақстан Республикасының экономикасын жаңғырту мәселелері жөніндегі мемлекеттік комиссия (бұдан әрі – Мемлекеттік комиссия) ЕДБ тізбесі және бірінші және екінші бағыттар бойынша лимиттер сомалары жөнінде ұсынымдар тұжырымдайды.";

3, 4 және 5-тармақтар мынадай редакцияда жазылсын:

"3. "Бәйтерек" ҰИХ" АҚ жасалған кредиттік шарт пен қарыз шартының талаптарына сәйкес қаражат сомасын "Даму" КДҚ" АҚ-ның және "ҚДБ" АҚ-ның ҚРҰБ-дағы жеке банктік шотына орналастырады.

4. "Даму" КДҚ" АҚ Қазақстан Республикасының азаматтық заңнамасына сәйкес ЕДБ-мен мынадай шарттарда кредиттік келісімдер жасасады:

1) Мемлекеттік комиссия мақұлдаған лимиттер шегінде ҚРҰБ-да ЕДБ-ның жеке банктік шоттарында кредит қаражатын қамтамасыз етпей орналастыру;

2) сыйақы мөлшерлемесі – жылдық 2 %-дан аспайды;

3) ЕДБ-ға кредит беру мерзімі – 20 жылға дейін;

4) қаражат ЕДБ шотына түскен күннен бастап ЕДБ-ның кредит қаражатын игеру мерзімі:

инвестициялық мақсаттарға берілетін кредиттер бойынша – 3 ай;

айналым қаражатын толықтыру мақсатына берілетін кредиттер бойынша – 3 ай.

5) ЕДБ-ға кредит беру валютасы – теңге;

6) "Даму" КДҚ" АҚ мен ЕДБ арасында жасалған кредиттік келісім шеңберінде:

Мемлекеттік комиссияның ұсынымдарына сәйкес ЕДБ лимитінің кемінде 50 %-ын ЕДБ Жоспарға 1-қосымшаға сәйкес өңдеу өнеркәсібінде және өңдеу өнеркәсібіне қызмет көрсетуге қатысты көрсетілетін қызметтер саласындағы ШОКС-ның инвестициялық жобаларын қаржыландыру мақсатына жіберетін қарыздардың үлесі құрайды;

Мемлекеттік комиссияның ұсынымдарына сәйкес ЕДБ лимитінің кемінде 50 %-ын ЕДБ Жоспарға 1-қосымшаға сәйкес өңдеу өнеркәсібіндегі ШОКС-ның айналым қаражатын толықтыру мақсатына жіберетін қарыздардың үлесі құрайды.

Бұл ретте Жоспарға 1-қосымшаға сәйкес өңдеу өнеркәсібіне қатысты көрсетілетін қызметтер саласындағы жобаларды іске асыратын ШОКС-ға айналым қаражаты берілмейді.

2019 жылдан бастап ШОКС-ны қаржыландырудан қайтарылған қаражат есебінен 25 (жиырма бес) миллиард теңге ҚР ҰҚ қаражатының айналыс мерзімінің соңына дейін қайтарылатын негізде экспорт алдындағы/экспорттық қаржыландыруға және/немесе экспортқа бағдарланған жобаларды қаржыландыруға жіберілетін болады. Экспорт алдындағы/экспорттық қаржыландыру – өнімді өндіруге және экспортқа өткізуге байланысты айналым қаражатын толықтыруға ШОКС жобасын қаржыландыру. Экспортқа бағдарланған жобаларды қаржыландыру – ШОКС-ға кейіннен экспорт үшін өнім өндіру мақсатында инвестициялық шығындарды жүзеге асыруға қаражат беру.

Пропорцияларды сақтау ЕДБ қаражатын екінші рет орналастыруға қолданылмайды.

5. "ҚДБ" АҚ Қазақстан Республикасының азаматтық заңнамасына сәйкес ЕДБ-мен мынадай шарттарда банктік қарыз шартын жасасады:

1) кредит қаражатын Мемлекеттік комиссия мақұлдаған лимиттер шегінде ҚРҰБ-да ЕДБ-ның жеке банктік шоттарында қамтамасыз етпей орналастыру;

2) сыйақы мөлшерлемесі – жылдық 2 %-дан аспайды;

3) ЕДБ-ға кредит беру мерзімі – 20 жылға дейін;

4) ЕДБ-ның кредит қаражатын игеру мерзімі – қаражат ЕДБ шотына түскен күннен бастап 18 ай;

5) ЕДБ-ға кредит беру валютасы – теңге;

6) "ҚДБ" АҚ мен ЕДБ арасында жасалған банктік қарыз шарты шегінде:

Мемлекеттік комиссия мақұлдаған ЕДБ лимитінің кемінде 100 %-ын ЕДБ Жоспарға 2-қосымшаға сәйкес өңдеу өнеркәсібінде түпкілікті қарыз алушылардың инвестициялық жобаларын қаржыландыру мақсатына жіберетін қарыздардың үлесі құрайды.";

8-тармақ мынадай редакцияда жазылсын:

"8. ЕДБ орналастырылатын қаражатты мақсатқа сай пайдаланбаған, толықтай немесе ішінара игермеген жағдайларда, сондай-ақ кредиттік келісімде немесе банктік қарыз шартында көзделген өзге де жағдайлар туындаған кезде "Даму" КДҚ" АҚ, "ҚДБ" АҚ ЕДБ-ге қатысты кредиттік келісімнің, банктік қарыз шартының талаптарына сәйкес шаралар қолданады, оның ішінде кредиттік келісімдерді, банктік қарыз шартын мерзімінен бұрын бұзу және/немесе кейін басқа ЕДБ арасында қайта бөле отырып, орналастырылған қаражатты кері қайтарып алу, және/немесе ЕДБ портфелін (банктік қарыз шарттары бойынша ШОКС/ІКС-ге құқықтар (талаптар) беру мәселесіне бастама көтеруге құқылы. Кері қайтарып алынған, ЕДБ мерзімінен бұрын өтеген қаражатты қайта бөлу, сондай-ақ ЕДБ портфелін (банктік қарыз шарттары бойынша ШОКС/ІКС-ге құқықтарды (талаптарды) басқа ЕДБ-ге беру Мемлекеттік комиссияның ұсынымдарын ескере отырып жүзеге асырылады.";

10-тармақ мынадай редакцияда жазылсын:

"10. Осы кіші бөлімнің 2-тармағында, 4-тармағының б) тармақшасында, 5-тармағының б) тармақшасында, 6, 7 және 8-тармақтарында көрсетілген шарттар "Alatau City Bank" АҚ берген қарыздарға қолданылмайды.";

"Өңдеу өнеркәсібінде шағын және орта кәсіпкерлік субъектілерін қаржыландыру шарттары" деген кіші бөлімдер мынадай редакцияда жазылсын:

"Өңдеу өнеркәсібінде шағын және орта кәсіпкерлік субъектілерін қаржыландыру шарттары

1. Нысаналы топ – бірінші бағыт бойынша өңдеу өнеркәсібінде және өңдеу өнеркәсібіне қызмет көрсетуге қатысты көрсетілетін қызметтер саласындағы жобаларды іске асыратын және (немесе) іске асыруды жоспарлап отырған ШОКС.

2. Мыналар:

1) Қазақстан Республикасының заңнамасына сәйкес дәрілік зат ретінде тіркелген, құрамында спирт бар медициналық мақсаттағы өнім (бальзамдардан басқа) шығару көзделетін жобаларды қоспағанда, акцизделетін тауар шығару көзделетін жобаларды іске асыратын;

2) акцияларының (жарғылық капиталдағы қатысу үлестерінің) елу және одан көп пайызы тікелей мемлекеттік кәсіпорындарға/мекемелерге, ұлттық басқарушы холдингтерге, ұлттық холдингтерге, ұлттық компанияларға тиесілі ШОКС қатысушы бола алмайды.

3. ШОКС мақұлданған өтінімдеріне кредит беру мақсатында ЕДБ ҚРҰБ-дағы ЕДБ жеке банктік шотынан қаражатты есептен шығару үшін қажетті сомаларды "Даму" КДҚ" АҚ-мен алдын ала келісуді жүзеге асырады. Бұл ретте қаражаттың мақсатқа сай пайдаланылуын түпкілікті тексеруді "Даму" КДҚ" АҚ ШОКС жобасын іске асыратын жерге барғаннан кейін жүзеге асырады.

4. Кредиттер ШОКС-ға мақсатқа сай пайдалану, ақылылық, мерзімділік, қайтарымдылық және қамтамасыз етілу шарттарымен беріледі, оның ішінде:

1) бір ШОКС/байланысты тұлғалар тобы үшін қаржыландырудың ең жоғары лимиті – "Даму" КДҚ" АҚ қаражатын шартты түрде орналастырудың барлық бағдарламалары бойынша қолданыстағы міндеттемелер ескерілгенде 7 (жеті) миллиард теңге;

2) кредит беру мерзімі:

инвестицияларға – 10 жылдан аспайды;

айналым қаражатын толықтыруға – 3 жылдан аспайды;

3) ШОКС үшін номиналды сыйақы мөлшерлемесі жылдық 12,6 %-дан аспайды, бұл ретте сыйақы мөлшерлемесінің көрсетілген мөлшері ҚР ҰҚ-ның қаражатын ЕДБ-дің қаражатымен микширлеу есебінен белгіленеді;

4) кредит беру валютасы – теңге.

5. Осы кіші бөлімнің шарттары "Alatau City Bank" АҚ берген қарыздарға қолданылмайды.";

"Өңдеу өнеркәсібінде ірі кәсіпкерлік субъектілерін қаржыландыру шарттары" деген кіші бөлімде:

4-тармақтың 3) тармақшасы мынадай редакцияда жазылсын:

"3) ІКС үшін номиналды сыйақы мөлшерлемесі жылдық 12,6 %-дан аспайды, бұл ретте сыйақы мөлшерлемесінің көрсетілген мөлшері ҚР ҰҚ-дың қаражатын ЕДБ-нің қаражатымен микширлеу есебінен белгіленеді;"

5-тармақ мынадай редакцияда жазылсын:

"5. Осы кіші бөлімнің шарттары "Alatau City Bank" АҚ берген қарыздарға қолданылмайды.";

"Мониторинг" деген кіші бөлімде:

3-тармақтың екінші бөлігі мынадай редакцияда жазылсын:

"Даму" КДҚ" АҚ және "ҚДБ" АҚ осы тармақтың шарттарына сәйкес ЕДБ-ден алынған ақпаратты Қазақстан Республикасы Президентінің 2025 жылғы 19 мамырдағы № 879 Жарлығымен құрылған ҚР ҰҚ-дан бөлінген қаражаттың жұмсалуды мониторингтеу жөніндегі комиссияға (бұдан әрі – Комиссия) және "Бәйтерек" ҰИХ" АҚ-ға береді.";

8-тармақ мынадай редакцияда жазылсын:

"8. Осы кіші бөлімнің 2, 3, 6 және 7-тармақтарының шарттары "Alatau City Bank" АҚ берген қарыздарға қолданылмайды.";

көрсетілген Жоспарға 1-қосымша осы өзгерістерге 2-қосымшаға сәйкес жаңа редакцияда жазылсын.

3. "Қазақстан Республикасының Үкіметі мен Қазақстан Республикасы Ұлттық Банкінің өңдеу өнеркәсібіндегі кәсіпкерлік субъектілерін қаржыландыруды қамтамасыз ету жөніндегі бірлескен іс-қимыл жоспарын бекіту туралы" Қазақстан Республикасы Үкіметінің 2015 жылғы 11 наурыздағы № 124 қаулысында:

көрсетілген қаулымен бекітілген Қазақстан Республикасының Үкіметі мен Қазақстан Республикасы Ұлттық Банкінің өңдеу өнеркәсібіндегі кәсіпкерлік

субъектілерін қаржыландыруды қамтамасыз ету жөніндегі бірлескен іс-қимыл жоспарында:

"Ағымдағы жағдайды талдау" деген бөлімде:

жетінші бөлік мынадай редакцияда жазылсын:

"Осы Қазақстан Республикасының Үкіметі мен Қазақстан Республикасы Ұлттық Банкінің өңдеу өнеркәсібіндегі кәсіпкерлік субъектілерін қаржыландыруды қамтамасыз ету жөніндегі бірлескен іс-қимыл жоспары (бұдан әрі – Жоспар) кәсіпкерлік субъектілерін мынадай бағыттар бойынша қолдауға бағытталған шаралар кешенін айқындайды:

бірінші бағыт: "Даму" кәсіпкерлікті дамыту қоры" акционерлік қоғамы (бұдан әрі – "Даму" КДҚ" АҚ) тізбесін Қазақстан Республикасының экономикасын жаңғырту мәселелері жөніндегі мемлекеттік комиссия мақұлдаған екінші деңгейдегі банктерге (бұдан әрі – ЕДБ) өңдеу өнеркәсібіндегі шағын және орта кәсіпкерлік субъектілерін (бұдан әрі – ШОКС) қаржыландыру үшін, оның ішінде өңдеу өнеркәсібінде ШОКС-ға берілген ЕДБ қарыздарын қайта қаржыландыруға, ЕДБ қарыздары бойынша айналым қаражатын қаржыландыруға, өңдеу өнеркәсібінде жаңа жобаларды қаржыландыруға кредит береді (бұдан әрі – бірінші бағыт) (мақсатқа сай пайдалану шарты "Alatau City Bank" акционерлік қоғамы (бұдан әрі – "Alatau City Bank" АҚ) берген қарыздарға қолданылмайды);

екінші бағыт: "Қазақстанның Даму Банкі" акционерлік қоғамының (бұдан әрі – "ҚДБ" АҚ) өңдеу өнеркәсібінде ірі кәсіпкерлік субъектілерін (бұдан әрі – ІКС) қаржыландыру үшін, оның ішінде өңдеу өнеркәсібіндегі ІКС-ге берілген ЕДБ қарыздарын қайта қаржыландыруға, өңдеу өнеркәсібіндегі ІКС-ге берілген ЕДБ қарыздары бойынша айналым қаражатын қаржыландыруға, өңдеу өнеркәсібіндегі жаңа жобаларды қаржыландыруға ЕДБ-ге банкаралық кредит беруі (бұдан әрі – екінші бағыт) (мақсатқа сай пайдалану шарты "Alatau City Bank" АҚ берген қарыздарға қолданылмайды).";

тоғызыншы бөлік мынадай редакцияда жазылсын:

"Тамақ өнеркәсібі саласындағы жобаларға бірінші бағыт бойынша кредит беру осы Жоспарға қосымшаға сәйкес тамақ өнеркәсібінің қаржыландыруға арналған салаларының тізбесіне (бұдан әрі – тізбе) сәйкес жүзеге асырылады. Бұл ретте, тамақ өнеркәсібі саласындағы жобаның нысаналы мақсатын растау үшін экономикалық қызмет түрлерінің жалпы жіктеуішінің (бұдан әрі – ЭҚЖЖ) нақты кодына байланыстырылған тізбеден кемінде бір тауар түрін шығару жеткілікті.";

"Жалпы ережелер" деген бөлімде:

"Мақсатқа қол жеткізу және қойылған міндеттерді іске асыру тетіктері" деген кіші бөлім мынадай редакцияда жазылсын:

"Мақсатқа қол жеткізу және қойылған міндеттерді іске асыру тетіктері

Қазақстан Республикасы Үкіметінің 2014 жылғы 14 сәуірдегі № 354 қаулысымен бекітілген Қазақстан Республикасының Үкіметі мен Қазақстан Республикасы Ұлттық Банкінің өңдеу өнеркәсібіндегі шағын және орта кәсіпкерлік жобаларын қаржыландыруды қамтамасыз ету жөніндегі бірлескен іс-қимыл жоспарын және Қазақстан Республикасы Үкіметінің 2014 жылғы 5 желтоқсандағы № 1276 қаулысымен бекітілген Қазақстан Республикасының Үкіметі мен Қазақстан Республикасы Ұлттық Банкінің өңдеу өнеркәсібінде кәсіпкерлік субъектілерін қаржыландыруды қамтамасыз ету жөніндегі бірлескен іс-қимыл жоспарын іске асыруды жалғастыра отырып, Қазақстан Республикасының Үкіметі, ҚР ҰБ, "Бәйтерек" ұлттық инвестициялық холдингі" акционерлік қоғамы (бұдан әрі – "Бәйтерек" ҰИХ" АҚ) өңдеу өнеркәсібінде ШОКС-ны және ІКС-ны кейіннен қаржыландыру үшін, оның ішінде бұрын берілген ЕДБ қарыздарын қайта қаржыландыруға, ШОКС-ның және ІКС-ның айналым қаражатын және жаңа жобаларын қаржыландыруға ЕДБ қаржыландыру бойынша қосымша шаралар қабылдайтын болады.

2014 жылы Қазақстан Республикасы Ұлттық қорының (бұдан әрі – ҚР ҰҚ) қаражатынан жоғарыда аталған шараларды іске асыру үшін ШОКС-ны және ІКС-ны қосымша қаржыландырудың жалпы көлемі 100 (жүз) миллиард теңгені құрайды.

Жыл	ШОКС жобалары	ІКС жобалары
2015	50 млрд теңге	50 млрд теңге

Осы мақсаттар үшін "Бәйтерек" ҰИХ" АҚ мынадай шарттарда 100 (жүз) миллиард теңге сомасына облигациялар шығару арқылы ҚР ҰҚ-дан қарыз алуды жүзеге асырады:

Шығару жылы	2015
ҚР ҰҚ қаражатынан орналастыру көлемі	100 млрд теңге
Купон мөлшерлемесі	жылдық 0,1 %
Өтеудің кірістілігі	жылдық 0,1 %
Облигациялардың айналыс мерзімі	облигациялардың айналысы басталған күннен бастап 20 жылға дейін
Облигациялық қарызды өтеу мерзімі	эмитенттің бастамасы бойынша мерзімінен бұрын өтеу құқығымен айналыс мерзімінің соңында

Облигацияларды орналастырғаннан кейін "Бәйтерек" ҰИХ" АҚ бірінші бағыт бойынша шараларды іске асыру үшін "Даму" КДҚ" АҚ-мен Қазақстан Республикасының азаматтық заңнамасына сәйкес кредиттік шарт жасасады және "Даму" КДҚ" АҚ-на мынадай шарттарда кредит береді:

- 1) кредит сомасы – 50 (елу) миллиард теңге;
- 2) мерзімі – кредиттік шартқа қол қойылған күннен бастап 20 жылға дейін;
- 3) сыйақы мөлшерлемесі – жылдық 0,15 %;

4) "Даму" КДҚ" АҚ бастамасы бойынша мерзімінен бұрын өтеу құқығымен жасалған кредиттік шарт талаптарына сәйкес мерзімнің аяғында қаражатты бір сомамен өтеу.

Облигацияларды орналастырғаннан кейін "Бәйтерек" ҰИХ" АҚ екінші бағыт бойынша шараларды іске асыру үшін "ҚДБ" АҚ-мен Қазақстан Республикасының азаматтық заңнамасына сәйкес қарыз шартын жасасады және "ҚДБ" АҚ-на мынадай шарттарда кредит береді:

- 1) кредит сомасы – 50 (елу) миллиард теңге;
- 2) мерзімі – кредиттік шартқа қол қойылған күннен бастап 20 жылға дейін;
- 3) сыйақы мөлшерлемесі – жылдық 0,15 %;
- 4) "ҚДБ" АҚ бастамасы бойынша мерзімінен бұрын өтеу құқығымен жасалған қарыз шартының талаптарына сәйкес мерзімнің аяғында қаражатты бір сомамен өтеу.";

"Қаражатты екінші деңгейдегі банктерде шартты орналастырудың талаптары мен тетіктері" деген кіші бөлімде:

1-тармақ мынадай редакцияда жазылсын:

"1. Мемлекеттік комиссия ЕДБ тізбесі және бірінші және екінші бағыт бойынша лимиттер сомалары жөнінде ұсынымдар тұжырымдайды.";

3, 4 және 5-тармақтар мынадай редакцияда жазылсын:

"3. "Бәйтерек" ҰИХ" АҚ жасалған кредиттік шарт пен қарыз шартының талаптарына сәйкес қаражат сомасын "Даму" КДҚ" АҚ-ның және "ҚДБ" АҚ-ның ҚР ҰБ-дағы жеке банктік шотына орналастырады.

4. "Даму" КДҚ" АҚ Қазақстан Республикасының азаматтық заңнамасына сәйкес ЕДБ-мен мынадай шарттарда кредиттік келісімдер жасасады:

1) Мемлекеттік комиссия ұсынған лимиттер шегінде ҚР ҰБ-да ЕДБ-ның жеке банктік шоттарында кредит қаражатын қамтамасыз етпей орналастыру;

2) сыйақы мөлшерлемесі – жылдық 2 %-дан аспайды;

3) ЕДБ-ға кредит беру мерзімі – 20 жылға дейін;

4) қаражат ЕДБ шотына түскен күннен бастап ЕДБ-ның кредиттік қаражатты игеру мерзімі:

инвестициялық мақсаттарға берілетін кредиттер бойынша – 3 ай;

айналым қаражатын толықтыру және бұрын берілген ЕДБ қарыздарын қайта қаржыландыру мақсаттарына берілетін кредиттер бойынша – 3 ай.

ЕДБ тарапынан ерте дегенде 2026 жылғы 1 қаңтардан қаржыландырылған өңдеу өнеркәсібіндегі ШОКС-не жаңа жобаларға берілген ЕДБ-нің қарыздары бойынша қайта қаржыландыруға жол беріледі;

5) ЕДБ-ға кредит беру валютасы – теңге;

6) "Даму" КДҚ" АҚ мен ЕДБ арасында жасалған кредиттік келісім шеңберінде:

Мемлекеттік комиссияның ұсынымдарына сәйкес ЕДБ лимитінің 25 %-ынан аспайтын бөлігін ЕДБ өңдеу өнеркәсібіндегі ШОКС-ге берген қарыздарды қайта қаржыландыруға жіберетін қарыздардың үлесі құрайды;

Мемлекеттік комиссияның ұсынымдарына сәйкес ЕДБ лимитінің 25 %-ынан аспайтын бөлігін ЕДБ өңдеу өнеркәсібіндегі ШОКС-ның айналым қаражатын толықтыру мақсатына жіберетін қарыздардың үлесі құрайды;

Мемлекеттік комиссияның ұсынымдарына сәйкес ЕДБ лимитінің кемінде 50 %-ын ЕДБ өңдеу өнеркәсібіндегі ШОКС-ның жаңа жобаларын қаржыландыруға жіберетін қарыздардың үлесі құрайды.

2019 жылдан бастап ШОКС-ны қаржыландырудан қайтарылған қаражат есебінен 25 (жиырма бес) миллиард теңге ҚР ҰҚ қаражатының айналыс мерзімінің соңына дейін қайтарылатын негізде экспорт алдындағы/экспорттық қаржыландыруға және/немесе экспортқа бағдарланған жобаларды қаржыландыруға жіберілетін болады.

Экспорт алдындағы/экспорттық қаржыландыру – өнімді өндіруге және экспортқа өткізуге байланысты айналым қаражатын толықтыруға ШОКС жобасын қаржыландыру . Экспортқа бағдарланған жобаларды қаржыландыру – ШОКС-ға кейіннен экспорт үшін өнім өндіру мақсатында инвестициялық шығындарды жүзеге асыруға қаражат беру.

Пропорцияларды сақтау ЕДБ-нің қаражатын екінші рет орналастыруға қолданылмайды.

5. "ҚДБ" АҚ Қазақстан Республикасының азаматтық заңнамасына сәйкес ЕДБ-мен мынадай шарттарда банктік қарыз шартын жасасады:

1) кредит қаражатын Мемлекеттік комиссия мақұлдаған лимиттер шегінде ҚР ҰБ-да ЕДБ-ның жеке банктік шоттарында қамтамасыз етпей орналастыру;

2) сыйақы мөлшерлемесі – жылдық 2 %-дан аспайды;

3) ЕДБ-ға кредит беру мерзімі – 20 жылға дейін;

4) "ҚДБ" АҚ мен ЕДБ арасында банктік қарыз шартын/лимиттерді өзгерту туралы қосымша келісім жасалған күннен бастап ЕДБ-нің кредиттік қаражатты игеру мерзімі: инвестициялық мақсаттарға берілетін кредиттер бойынша – 18 ай;

айналым қаражатын толықтыру және бұрын берілген ЕДБ қарыздарын қайта қаржыландыру мақсаттарына берілетін кредиттер бойынша – 6 ай;

5) ЕДБ-ға кредит беру валютасы – теңге;

2019 жылдан бастап ІКС-нің қолданыстағы кредиттік желілерінің жабылуына қарай босайтын қаражат есебінен 25 (жиырма бес) миллиард теңге ҚР ҰҚ қаражатының айналыс мерзімінің соңына дейін қайтарылатын негізде ІКС-нің экспорт алдындағы/экспорттық қаржыландыруға және/немесе экспортқа бағдарланған жобаларын қаржыландыруға жіберілетін болады.

Экспорт алдындағы/экспорттық қаржыландыру – өнімді өндіруге және экспортқа өткізуге байланысты айналым қаражатын толықтыруға ІКС жобасын қаржыландыру. Экспортқа бағдарланған жобаларды қаржыландыру – ІКС-ге кейіннен экспорт үшін өнім өндіру мақсатында инвестициялық шығындарды жүзеге асыруға қаражат беру.

Пропорцияларды сақтау ЕДБ қаражатын екінші рет орналастыруға қолданылмайды.
";

8-тармақ мынадай редакцияда жазылсын:

"8. ЕДБ орналастырылатын қаражатты мақсатына сай пайдаланбаған, толықтай немесе ішінара игермеген жағдайларда, сондай-ақ кредиттік келісімде немесе банктік қарыз шартында көзделген өзге де жағдайлар туындаған кезде "Даму" КДҚ" АҚ, "ҚДБ" АҚ ЕДБ-ге қатысты кредиттік келісімнің, банктік қарыз шартының талаптарына сәйкес шаралар қолданады, оның ішінде кредиттік келісімдерді, банктік қарыз шартын мерзімінен бұрын бұзу және/немесе кейін басқа ЕДБ-лар арасында қайта бөле отырып, орналастырылған қаражатты кері қайтарып алу және/немесе ЕДБ портфелін (банктік қарыз шарттары бойынша ШОКС/ІКС-ге құқықтар (талаптар) беру мәселесіне бастама жасауға құқылы. Кері қайтарып алынған, ЕДБ мерзімінен бұрын өтеген қаражатты қайта бөлу, сондай-ақ ЕДБ портфелін (банктік қарыз шарттары бойынша ШОКС/ІКС-ге құқықтарды (талаптарды) басқа ЕДБ-ге беру Мемлекеттік комиссияның ұсынымдарын ескере отырып жүзеге асырылады.";

10-тармақ мынадай редакцияда жазылсын:

"10. Осы кіші бөлімнің 2-тармағында, 4-тармағының б) тармақшасында, 5-тармағының б) тармақшасында, 6, 7 және 8-тармақтарында көрсетілген шарттар "Alatau City Bank" АҚ берген қарыздарға қолданылмайды.";

"Өңдеу өнеркәсібінде шағын және орта кәсіпкерлік субъектілерін қаржыландыру шарттары" деген кіші бөлімдер мынадай редакцияда жазылсын:

"Өңдеу өнеркәсібінде шағын және орта кәсіпкерлік субъектілерін қаржыландыру шарттары

1. Нысаналы топ – бірінші бағыт бойынша өңдеу өнеркәсібінде жобаларды іске асыратын және (немесе) іске асыруды жоспарлап отырған ШОКС.

2. Мыналар:

1) Қазақстан Республикасының заңнамасына сәйкес дәрілік зат ретінде тіркелген, құрамында спирт бар медициналық мақсаттағы өнім (бальзамдардан басқа) шығару көзделетін жобаларды қоспағанда, акцизделетін тауар шығару көзделетін жобаларды іске асыратын;

2) акцияларының (жарғылық капиталдағы қатысу үлестерінің) елу және одан көп пайызы тікелей мемлекеттік кәсіпорындарға/мекемелерге, ұлттық басқарушы холдингтерге, ұлттық холдингтерге, ұлттық компанияларға тиесілі ШОКС қатысушы бола алмайды.

3. ШОКС мақұлданған өтінімдеріне кредит беру мақсатында ЕДБ ҚР ҰБ-дағы жеке банктік шотынан қаражатты есептен шығару үшін қажетті сомаларды "Даму" КДҚ" АҚ-мен алдын ала келісуді жүзеге асырады. Бұл ретте қаражаттың мақсатты пайдаланылуын түпкілікті тексеруді "Даму" КДҚ" АҚ ШОКС жобасын іске асыратын жерге барғаннан кейін жүзеге асырады.

4. Кредиттер ШОКС-ға мақсатқа сай пайдалану, ақылылық, мерзімділік, қайтарымдылық және қамтамасыз етілу шарттарымен беріледі, оның ішінде:

1) бір ШОКС/байланысты тұлғалар тобы үшін қаржыландырудың ең жоғары лимиті "Даму" КДҚ" АҚ қаражатын шартты түрде орналастыру бойынша барлық бағдарламалар бойынша ағымдағы міндеттемелер ескерілгенде 7 (жеті) миллиард теңгені құрайды;

2) кредит беру мерзімі:

жаңа жобаларға және ШОКС-ның қолданыстағы инвестициялық қарыздарын қайта қаржыландыруға – 10 жылдан аспайды;

айналым қаражатын толықтыруға және айналым қаражатын толықтыру мақсатында берілген қолданыстағы қарыздарды қайта қаржыландыруға – 3 жылдан аспайды;

3) ШОКС үшін номиналды пайыздық мөлшерлеме жылына 12,6 %-дан аспайды, бұл ретте сыйақы мөлшерлемесінің көрсетілген мөлшері ҚР ҰҚ-ның қаражатын ЕДБ-нің қаражатымен микширлеу есебінен белгіленеді;

4) кредит беру валютасы – теңге.

5. Осы кіші бөлімнің шарттары "Alatau City Bank" АҚ берген қарыздарға қолданылмайды.";

"Өңдеу өнеркәсібінде ірі кәсіпкерлік субъектілерін қаржыландыру шарттары" деген кіші бөлімде:

4-тармақтың 3) тармақшасы мынадай редакцияда жазылсын:

"3) ІКС үшін номиналды сыйақы мөлшерлемесі – жылдық 12,6 %-дан аспайды, бұл ретте сыйақы мөлшерлемесінің көрсетілген мөлшері ҚР ҰҚ-ның қаражатын ЕДБ-нің қаражатымен микширлеу есебінен белгіленеді.";

5-тармақ мынадай редакцияда жазылсын:

"5. Осы кіші бөлімнің шарттары "Alatau City Bank" АҚ берген қарыздарға қолданылмайды.";

"Мониторинг" деген кіші бөлімде:

3-тармақтың екінші бөлігі мынадай редакцияда жазылсын:

"Даму" КДҚ" АҚ және "ҚДБ" АҚ осы тармақтың шарттарына сәйкес ЕДБ-нен алынған ақпаратты Қазақстан Республикасы Президентінің 2025 жылғы 19 мамырдағы № 879 Жарлығымен құрылған ҚР ҰҚ-дан бөлінген қаражаттың жұмсалудың мониторингтеу жөніндегі комиссияға (бұдан әрі – Комиссия) және "Бәйтерек" ҰИХ" АҚ-ға береді.";

8-тармақ мынадай редакцияда жазылсын:

"8. Осы кіші бөлімнің 2, 3, 6 және 7-тармақтарының шарттары "Alatau City Bank" АҚ берген қарыздарға қолданылмайды.".

4. "Қазақстан Республикасының Үкіметі мен Қазақстан Республикасы Ұлттық Банкінің отандық өндірушілер мен экспорттаушыларды қаржыландыруды қамтамасыз

ету жөніндегі бірлескен іс-қимыл жоспарын бекіту туралы" Қазақстан Республикасы Үкіметінің 2015 жылғы 23 сәуірдегі № 271 қаулысында:

көрсетілген қаулымен бекітілген Қазақстан Республикасының Үкіметі мен Қазақстан Республикасы Ұлттық Банкінің отандық өндірушілер мен экспорттаушыларды қаржыландыруды қамтамасыз ету жөніндегі бірлескен іс-қимыл жоспарында:

"Ағымдағы жағдайды талдау" деген бөлімде:

он екінші бөлік мынадай редакцияда жазылсын:

"Осы Қазақстан Республикасының Үкіметі мен Қазақстан Республикасы Ұлттық Банкінің (бұдан әрі – ҚР ҰБ) отандық өндірушілер мен экспорттаушыларды қаржыландыруды қамтамасыз ету жөніндегі бірлескен іс-қимыл жоспары (бұдан әрі – Жоспар) "Қазақстанның Даму Банкі" акционерлік қоғамының (бұдан әрі – "ҚДБ" АҚ) еншілес ұйымы – "Өнеркәсіпті дамыту қоры" акционерлік қоғамымен (бұдан әрі – "ӨДҚ" АҚ) бірлесіп лизинг және/немесе қарыз тетігі арқылы мынадай үш бағыт бойынша қаржыландыруды ұсынуы арқылы 2015 – 2016 жылдары орта және ірі кәсіпкерлік субъектілерін (бұдан әрі – ОІКС) қолдауға бағытталған шаралар кешенін айқындайды:

- 1) бірінші бағыт: отандық автоөндірушілерді қолдау;
- 2) екінші бағыт: жолаушы вагондарының өндірісін қолдау;
- 3) үшінші бағыт: экспорттаушыларды қолдау.;"

"Жалпы ережелер" деген бөлімде:

"Мақсатқа қол жеткізу және қойылған міндеттерді іске асыру тетіктері" деген кіші бөлім мынадай редакцияда жазылсын:

"Мақсатқа қол жеткізу және қойылған міндеттерді іске асыру тетіктері

Қазақстан Республикасы Ұлттық қорының (бұдан әрі – Ұлттық қор) қаражатынан 2015 – 2016 жылдары отандық өндірушілер мен экспорттаушыларды қолдау үшін ОІКС жалпы қаржыландыру көлемі 100 (жүз) миллиард теңгені құрайды.

Осы мақсаттар үшін "Бәйтерек" ұлттық инвестициялық холдингі" акционерлік қоғамы (бұдан әрі – "Бәйтерек" ҰИХ" АҚ) облигациялар айналысы басталған күннен бастап 20 жылға дейінгі мерзімге жылдық 0,1 % сыйақы мөлшерлемесі бойынша 100 (жүз) миллиард теңге сомасына (2015 жылы 85 (сексен бес) миллиард теңге және 2016 жылы 15 (он бес) миллиард теңге) облигациялар шығару арқылы Ұлттық қордан қарыз алуды жүзеге асырады. Облигациялық қарыздарды өтеу мерзімі – эмитенттің бастамасы бойынша мерзімінен бұрын өтеу құқығымен айналыс мерзімінің соңында.

Қаражат алғаннан кейін "Бәйтерек" ҰИХ" АҚ жоғарыда аталған үш бағыт бойынша шараларды іске асыру үшін мынадай негізгі шарттарда қарыз шартын жасасу арқылы "ҚДБ" АҚ-ға 2015 жылы 85 (сексен бес) миллиард теңге және 2016 жылы 15 (он бес) миллиард теңге көлемінде қарыз қаражатын береді:

- 1) сыйақы мөлшерлемесі – жылдық 0,15 %;

2) қарыз мерзімі – 20 жылға дейін;

3) негізгі қарызды төлеу – қарыз алушының бастамасы бойынша мерзімінен бұрын өтеу құқығымен айналыс мерзімінің соңында;

4) қарыз бойынша сыйақыны төлеу – жылына 2 рет;

5) қарыздың нысаналы мақсаты – отандық автоөндірушілер, жолаушы вагондарын өндірушілер үшін лизинг және/немесе қарыз тетігі арқылы қаржыландыруды ұсыну; экспорттық және экспорт алдындағы кредит беру;

6) қарыз көлемі – 100 (жүз) миллиард теңге, оның ішінде 2015 жылы: отандық автоөндірушілерді қолдауға – 30 (отыз) миллиард теңге, жолаушы вагондарының өндірісін қолдауға – 5 (бес) миллиард теңге және экспорттаушыларды қолдауға – 50 (елу) миллиард теңге; 2016 жылы экспорттаушыларды қолдауға – 15 (он бес) миллиард теңге.

"ҚДБ" АҚ Ұлттық қордан бөлінетін қаражаттан төлемдер жасау үшін ҚР ҰБ-да жеке банктік шот ашады.

"Бәйтерек" ҰИХ" АҚ жасалған қарыз шартының талаптарына сәйкес қаражат сомасын "ҚДБ" АҚ-ның ҚР ҰБ-дағы жеке банктік шотында орналастырады.

"ҚДБ" АҚ осы Жоспарда айқындалған шарттарда үш бағыт бойынша ОІКС-ны қаржыландыруды ұсынады.";

"Қаржыландыру тетіктері мен шарттары" деген бөлімде:

"Отандық автоөндірушілерді қолдау" деген 1-тарауда:

"Екінші деңгейдегі банктер арқылы отандық автоөндірушілерді қолдау шеңберінде негізделген қаржыландыру" және "Отандық өндірістің автомобильдерін сатып алушыларды – түпкілікті қарыз алушыларды қаржыландыру шарттары" деген кіші бөлімдер мынадай редакцияда жазылсын:

"Екінші деңгейдегі банктер арқылы отандық автоөндірушілерді қолдау шеңберінде негізделген қаржыландыру

Ұлттық қор қаражаты отандық өндірістің жеңіл автокөлігін сатып алушы жеке тұлғаларға кредит беру үшін екінші деңгейдегі банктерді (бұдан әрі – ЕДБ) негізделген қаржыландыру арқылы отандық автоөндірушілерді қолдау үшін бөлінеді.

1. Қаржыландырудың жалпы лимиті – кемінде 23 (жиырма үш) миллиард теңге.

2. Қазақстан Республикасының экономикасын жаңғырту мәселелері жөніндегі мемлекеттік комиссия (бұдан әрі – Мемлекеттік комиссия) отандық автоөндірушілердің тізбесін және олардағы лимиттер сомаларын, сондай-ақ ЕДБ тізбесін және ЕДБ-дегі лимиттер сомаларын ұсынады.

3. "ҚДБ" АҚ және ЕДБ Ұлттық қордан бөлінетін қаражаттан төлемдер жасау үшін ҚР ҰБ-да жеке банктік шоттар ашады.

4. "Бәйтерек" ҰИХ" АҚ жасалған қарыз шартының талаптарына сәйкес қаражат сомасын "ҚДБ" АҚ-ның ҚР ҰБ-дағы жеке банктік шотында орналастырады.

5. "ҚДБ" АҚ ЕДБ-мен мынадай негізгі шарттармен банктік қарыз шартын жасасады

1) Мемлекеттік комиссия мақұлдаған лимиттер шегінде қарыз қаражатын ЕДБ-нің ҚР ҰБ-дағы жеке банктік шоттарында қамтамасыз етпей орналастыру;

2) сыйақы мөлшерлемесі – жылдық 1,0 %-дан аспайды;

3) ЕДБ қарызының мерзімі – 20 жылға дейін;

4) қарыз бойынша сыйақы төлеу – жылына 2 рет;

5) ЕДБ-нің кредит қаражатын игеру мерзімі – қарыз сомасын ұлғайту туралы ҚДБ мен ЕДБ арасында банктік қарыз шартын/банктік қарыз шартына қосымша келісім жасалған күнінен бастап 18 айға дейін;

6) ЕДБ қарыз валютасы – теңге;

7) негізгі борышты өтеу – мерзімінен бұрын ішінара немесе толық өтеу құқығымен тиісті қарыз шартының талаптарына сәйкес мерзімнің соңында;

8) "ҚДБ" АҚ мен ЕДБ арасында жасалған банктік қарыз шарты шеңберінде қаражат отандық өндірістің жеңіл автокөлігін сатып алушы жеке тұлғаларға кредит беру мақсаттары үшін ЕДБ-ға жіберіледі.

6. ЕДБ орналастырылған кредиттік қаражаттың нысаналы пайдаланылуы және игерілуі бойынша "ҚДБ" АҚ алдында есеп береді.

ЕДБ есептерін ұсыну тәртібі, нысаны және мерзімділігі, сондай-ақ осы Жоспарда көзделмеген ЕДБ кредиттерін берудің өзге шарттары тиісті банктік қарыз шартында белгіленеді.

ЕДБ-ның бөлінетін қаражатты шетел валютасына инвестициялауға жіберуіне тыйым салынады.

Түпкілікті қарыз алушылардың бұрын берілген қарыздарды өтеуі есебінен босаған қаражатты ҚР ҰБ-дағы өзінің жеке банктік шоттарына есепке жазуды ЕДБ ай сайынғы негізде жүзеге асырады.

7. Түпкілікті қарыз алушылар отандық өндірістің жеңіл автокөлігін сақтандыру және кепілге ресімдеу бойынша шығыстарды төлейді.

8. Бөлінген қаражат мақсатқа сай пайдаланылмаған және/немесе уақтылы игерілмеген жағдайда, сондай-ақ "ҚДБ" АҚ мен ЕДБ арасындағы банктік қарыз шартында көзделген жағдайлар орын алғанда "ҚДБ" АҚ тиісті банктік қарыз шартын мерзімінен бұрын бұзуға және жоғарыда аталған бұзушылықтар анықталған орналастырылған қаражатты кері қайтарып алуға құқылы.

9. "ҚДБ" АҚ мен ЕДБ арасында жасалған банктік қарыз шарттары бойынша қарыздарды ЕДБ мерзімінен бұрын өтеген жағдайда аталған қаражатты қайта пайдалану Мемлекеттік комиссияның тиісті шешімінің негізінде жүзеге асырылады.

Отандық өндірістің автомобильдерін сатып алушыларды – түпкілікті қарыз алушыларды қаржыландыру шарттары

Нысаналы топ – отандық өндірістің жеңіл автокөлігін сатып алушы жеке тұлғалар.

1. Түпкілікті қарыз алушылардың мақұлданған өтінімдеріне кредит беру мақсатында қаражатты ЕДБ-ның ҚР ҰБ-дағы жеке банктік шотынан есептен шығару үшін қажетті сомаларды ЕДБ "ҚДБ" АҚ-мен алдын ала келісуді жүзеге асырады.

2. Кредиттер түпкілікті қарыз алушыларға мақсатқа сай пайдалану, ақылылық, мерзімділік, қайтарымдылық және қамтамасыз етілу шарттарымен беріледі, оның ішінде:

1) жеңіл автокөліктің 1 бірлігінің құны 15 (он бес) миллион теңгеден аспайды;

2) кредит беру мерзімі – 7 жылдан аспайды;

3) түпкілікті қарыз алушы үшін номиналды сыйақы мөлшерлемесі жылдық 12,6 %-дан аспауға тиіс, бұл ретте сыйақы мөлшерлемесінің көрсетілген мөлшері Ұлттық қор қаражатын ЕДБ-нің қаражатымен микширлеу есебінен белгіленеді;

4) кредит беру валютасы – теңге;

5) түпкілікті қарыз алушы ЕДБ алдындағы қарызды өтеген кезде ЕДБ-нің қайтарылған қаражат есебінен және осы Жоспарда айқындалған шарттарда отандық өндірістің жеңіл автокөлігін сатып алушыларға қайта кредит беруіне жол беріледі.";

"Отандық автомобильдер өндірісін қолдау шеңберінде лизингтік қаржыландыру" деген кіші бөлім мынадай редакцияда жазылсын:

"Отандық автомобильдер өндірісін қолдау шеңберінде лизингтік қаржыландыру

Нысаналы топ – отандық өндірістің ауыл шаруашылығы техникасын қоспағанда, автокөлік құралдарын және арнайы мақсаттағы автотехниканы лизингке сатып алатын заңды тұлғалар және дара кәсіпкерлер.

"ҚДБ" АҚ мынадай шарттарда "ӨДҚ" АҚ-мен қарыз шартын жасасады:

1) қарыз сомасы – 7 (жеті) миллиард теңгеден аспайды;

2) сыйақы мөлшерлемесі — жылдық 0,25 %;

3) қарыз мерзімі – 20 жылға дейін;

4) қарыз бойынша сыйақы төлеу – жылына 2 рет;

5) негізгі қарызды өтеу – "ӨДҚ" АҚ бастамасы бойынша мерзімінен бұрын ішінара немесе толық өтеу құқығымен тиісті қарыз шартының талаптарына сәйкес мерзімнің соңында;

6) қарыз валютасы – теңге.

"ӨДҚ" АҚ ауыл шаруашылығы техникасын қоспағанда, көлік құралдары мен арнайы мақсаттағы автотехниканы отандық автоөндірушілерден автокөлік құралдарын және арнайы мақсаттағы автотехниканы сатып алып, кейіннен мақсатқа сай пайдалану, ақылылық, мерзімділік, қайтарымдылық және қамтамасыз етілу шарттарымен агенттерді тарта отырып лизингке береді, оның ішінде:

1) лизинг беруші – "ӨДҚ" АҚ;

2) лизингтің мәні – ауыл шаруашылығы техникасын қоспағанда, автокөлік құралдары және арнайы мақсаттағы автотехника (бұдан әрі – автокөлік құралдары);

3) лизинг алушы – автокөлік құралдарын лизингке сатып алатын заңды тұлғалар және дара кәсіпкерлер;

4) лизинг мерзімі – 3 жылдан 5 жылға дейін;

5) номиналды сыйақы мөлшерлемесі – жылдық 12,6 %-дан аспайды;

6) қаржыландыру валютасы – теңге;

7) лизинг бойынша бастапқы жарна (аванс) – лизинг мәні құнының 30 %-ы;

8) негізгі борышты төлеу бойынша жеңілдікті кезең – 6 айға дейін;

9) сыйақы төлеу бойынша жеңілдікті кезең – жоқ;

10) қосымша шығыстар (сақтандыру, сервистік және агенттік қызмет көрсету) – лизинг алушының есебінен;

11) лизинг алушылар "ӨДҚ" АҚ алдындағы төлемдерді өтеген кезде қайтарылған қаражат есебінен және осы Жоспарда айқындалған шарттарда қайта лизингтік қаржыландыруға жол беріледі.";

"Жолаушылар вагондарының өндірісін қолдау" деген 3-тарауда:

екінші бөліктің 2) тармақшасы мынадай редакцияда жазылсын:

"2) номиналды сыйақы мөлшерлемесі – жылдық 12,6 %-дан аспайды;".

"Экспорттаушыларды қолдау" деген 4-тарауда:

"Отандық экспорттаушыларды қолдау шеңберінде тікелей кредит беру, негізделген және лизингтік қаржыландыру" деген кіші бөлімде:

2-тармақта:

2) тармақша мынадай редакцияда жазылсын:

"2) номиналды сыйақы мөлшерлемесі – жылдық 12,6 %-дан аспайды;"

4) тармақша мынадай редакцияда жазылсын:

"4) қарыз/лизинг бойынша қамтамасыз ету – "ҚДБ" АҚ және/немесе "ӨДҚ" АҚ талаптарына сәйкес.";

3-тармақ мынадай редакцияда жазылсын:

"3. Отандық экспорттаушыларды қолдауды қаржыландыру бойынша рәсімдер мен қарау мерзімдерін оңайлату мақсатында "ҚДБ" АҚ-ның және/немесе "ӨДҚ" АҚ-ның жобаларды қарау тәртібін және оларға қойылатын талаптарды регламенттейтін ішкі қағидаларына тиісті өзгерістер мен толықтырулар енгізу көзделеді."

Қазақстан Республикасы
Үкіметінің
кейбір шешімдеріне
енгізілетін өзгерістерге
I-қосымша
Қазақстан Республикасының
Үкіметі мен Қазақстан
Республикасы Ұлттық
Банкінің өңдеу өнеркәсібіндегі
шағын және орта кәсіпкерлік
жобаларын қаржыландыруды
қамтамасыз ету жөніндегі

Шағын және орта кәсіпкерлік субъектілерінің жобаларын қаржыландыру үшін өңдеу өнеркәсібі салаларының тізбесі

Секция	Атауы	ЭҚЖЖ коды
1	2	3
C	Өңдеу өнеркәсібі	10-33
	Тамақ өнімдерінің өндірісі	10
	Сусындар өндірісі	11
	Тоқыма бұйымдарының өндірісі	13
	Киім өндірісі	14
	Былғары және оған қатысты өнімдер өндірісі	15
	Жиһаздан басқа ағаш және тығын бұйымдарының өндірісі; сабаннан және тоқуға арналған материалдардан жасалған бұйымдар өндірісі	16
	Қағаз және қағаз өнімдерінің өндірісі	17
	Полиграфиялық қызмет және жазып алынған ақпарат жеткізгіштерді тыңдатаып көрсету	18
	Кокс және мұнай өңдеу өнімдерінің өндірісі	19
	Химия өнеркәсібі өнімдерінің өндірісі	20
	Негізгі фармацевтикалық өнімдер мен препараттар өндірісі	21
	Резеңке және пластмасса бұйымдарының өндірісі	22
	Өзге де металл емес минералды өнімдер өндірісі	23
	Металлургия өнеркәсібі	24
	Машиналар мен жабдықтардан басқа, дайын металл бұйымдардың өндірісі	25
	Компьютерлер, электрондық және оптикалық жабдықтар өндірісі	26
	Электр жабдықтарының өндірісі	27
	Басқа да санаттарға енгізілмеген машиналар мен жабдықтар өндірісі	28
	Автомобильдер, тіркемелер және жартылай тіркемелер өндірісі	29

	Өзге де көлік құралдарының өндірісі	30
	Жиһаз өндірісі	31
	Өзге де дайын бұйымдар өндірісі	32
	Машиналар мен жабдықтарды жөндеу және орнату	33

Қазақстан Республикасы
 Үкіметінің
 кейбір шешімдеріне
 енгізілетін өзгерістерге
 2-қосымша
 Қазақстан Республикасының
 Үкіметі мен Қазақстан
 Республикасы Ұлттық
 Банкінің өңдеу өнеркәсібінде
 кәсіпкерлік субъектілерін
 қаржыландыруды қамтамасыз
 ету жөніндегі бірлескен
 іс-қимыл жоспарына
 1-қосымша

Шағын және орта кәсіпкерлік субъектілерінің жобаларын қаржыландыру үшін өңдеу өнеркәсібі салаларының тізбесі

Секция	Атауы	ӘҚЖЖ коды
1	2	3
C	Өңдеу өнеркәсібі	10-33
	Тамақ өнімдерінің өндірісі	10
	Сусындар өндірісі	11
	Тоқыма бұйымдарының өндірісі	13
	Киім өндірісі	14
	Былғары және оған қатысты өнімдер өндірісі	15
	Жиһаздан басқа ағаш және тығын бұйымдарының өндірісі; сабаннан және тоқуға арналған материалдардан жасалған бұйымдар өндірісі	16
	Қағаз және қағаз өнімдерінің өндірісі	17
	Полиграфиялық қызмет және жазып алынған ақпарат жеткізгіштерді тыңдатып көрсету	18
	Кокс және мұнай өңдеу өнімдерінің өндірісі	19
	Химия өнеркәсібі өнімдерінің өндірісі	20

	Негізгі фармацевтикалық өнімдер мен препараттар өндірісі	21
	Режеңке және пластмасса бұйымдарының өндірісі	22
	Өзге де металл емес минералды өнімдер өндірісі	23
	Металлургия өнеркәсібі	24
	Машиналар мен жабдықтардан басқа, дайын металл бұйымдардың өндірісі	25
	Компьютерлер, электрондық және оптикалық жабдықтар өндірісі	26
	Электр жабдықтарының өндірісі	27
	Басқа да санаттарға енгізілмеген машиналар мен жабдықтар өндірісі	28
	Автомобильдер, тіркемелер және жартылай тіркемелер өндірісі	29
	Өзге де көлік құралдарының өндірісі	30
	Жиһаз өндірісі	31
	Өзге де дайын бұйымдар өндірісі	32
	Машиналар мен жабдықтарды жөндеу және орнату	33

Өңдеу өнеркәсібіне қызмет көрсетуге қатысты көрсетілетін қызметтер аясы салаларының тізбесі

Секция	Атауы	ӘҚЖЖ коды
1	2	3
Н	Көлік және жинақтау	49-53
	Жүк теміржол көлігінің қызметі	49.20
	Жүк автомобиль көлігінің қызметі	49.41
	Құбыр көлігінің қызметі	49.50
	Теңіз және су жағасындағы жүк көлігінің қызметі	50.20
	Өзендегі жүк көлігінің қызметі	50.40
	Жүктерді қоймаға қою және сақтау	52.10
	Құрлықтағы жол көлігінің қосалқы қызметі	52.21
	Су көлігінің қосалқы қызметі	52.22
	Әуе көлігінің қосалқы қызметі	52.23
	Жүктерді көліктік өңдеу	52.24
	Өзге де көліктік қосалқы қызмет	52.29

© 2012. Қазақстан Республикасы Әділет министрлігінің «Қазақстан Республикасының Заңнама және құқықтық ақпарат институты» ШЖҚ РМК